

# Papru

## TISARÚNIKIANMAYA SHUARAN

### Ataksha papin aar ákuptukma

*Papru ni tsaniakmarijiai Yus-shuaran  
áatramiania nu*

<sup>1</sup> Wikia Pápruitjai. Wisha Serpanujai tura Tim-iutéujai iruntran atumin Tisarúnikianmaya Yus-shuar árumna nuna jü papin áatjarme. Atumsha ii Aparí Yusna tura Uunt Jesukrístunu ajasuitrume.  
<sup>2</sup> Tuma asakrumin ii Aparí Yus tura ii Uuntri Jesukrístusha waitnentrama ásarmatai yáinmakar péñker awajtamsarat tusan wakerajrume.

*Kristu támtai tunáa shuáran Yus asutiáttawai*

<sup>3</sup> Yatsurú, átum péñker matsatu asakrumin iisha Yus tuke yúmiñkiaji. Átumka Yus nekas enentáimtustin nú núkap nekaakrum wéarme. Tura nuamtak aneniastincha nú núkap nékarne. Nu tuma asamtaí Yus yumiñsatniuitji. <sup>4</sup> Átum Yus-shuar asakrumin chíkich shuar atumin yajauch awajtomainiawai. Tura itiurchat wainiu asarum ti wáitiarme. Nu tuma aïñ átumka katsuntearame, tuke Yus enentáimta asarum. Nu tuma asakrumin, iisha Yus-shuar matsatainia nuka warasar ujainiaji. <sup>5</sup> “Yusa akupeamurin pachiinkiamniaitrumé” Yus túramprume. Nui pachiinkiataj tau asarum jü nuñkanam wáitiarme. Tura wáitiakrumsha nuna nañkaamas iwiarnaruitrume nui pachiinkiatin. Kame núañkia Yus atumin achirmak péñker túraiti,

nuka páantaiti. **6** Núnisan atumin wáitkiarmainia nunasha Yus tímiatrusan wáitkiasartinchá nekas péñkeraiti. **7** Tura wáitiarmena nusha Yus íijiasha ayamtikramprartin péñkeraiti. Ii Uuntri Jesukristu ji keana ímianisan kakaram suntarijiai nayaimpinmaya tara wantinkiamtai, nu tsawantaí Yus ayampratniun suramsartatji. **8** Tura nú tsawantaisha Yúsan nékainiatsna núnaka ii Uuntri Jesukristu ti asutiátajtsa tátatui. **9** Taa, nincha meñkakatniunam akupkartatui. Chichaak “Wi pujajna juyá akupeajrume” títiatui. Tura winia ti kakarmar atsana nui akupeajrume, átum winia umirtukcha asakrumín” nin tiartatui. **10** Kame Uunt Jesukristu tátin tsawantri jeamtai, ni shuari, ni enentái péñker awajsaru áinia nu, ni náarin shiir pachisartatui. Tura Yúsan umikiaru ásar, ti shiir enentáimsar Jesukristun íisartatui. Ii ujakmajrumna nu antukrum umirka asarum atumsha nui pachiinkiattarme. **11** Nu tuma asamtai ii Yusriñ atumin tuke áujtajrume. Yus atumin achirmakuitrume. Nuinkia Yuska atumí enentáin takas Nii wakerá nujai métek awajtamsati, taji. Yus umirka asarum péñker wekasataj tusarum wakerarme. Túrarum Yus enentáimtusrum péñker túratin wakerarme. Tura wakerarmena nu umiktin Yuska ni kakarmaríjiai yáintí, tu áujtaji. **12** Átum péñker wekasa asakrumín chíkch shuarsha ii Uuntri Jesukristu náarin nañkaamantu enentáimtusartatui. Nusha auka ii Yusriñ tura ii Uuntri Jesukristu waitnentáimturmasar péñker wekasatniun yáinmakui túrarme. Túramtai chíkch shuar shiir enentáimturmasartatui.

**2**

*Tuke Tunaarintin wantinkiattana nu*

<sup>1</sup> Tura, yatsuru, ii Uuntri Jesukrístu tátatna nuna tura Niijiai inkiunaiktatjinia nunasha ujaktinian wakerajrume. <sup>2</sup> Chíkich shuar anañkramawar “Uunt Jesukrístu tsawantri jeayi” tu ujatmaktaj tusar wakeruiniawai. “Iimiarmaj nujai nékajai” turamainiakuisha, “chícham étserman antukmaj nujai nékajai” turamainiakuisha, tura “Papru papi áarmari nuna takui nékajai” turamainiakuisha, páchim enentáimprairap. Tura sapijmiakairap tusan seajrume. <sup>3</sup> Peñké anañnawairap. Nekaatarum. Nu tsawant jeatsain Yúsnumia kanaktin átatui. Tura nú arant, Tuke Tunaarintin, emesnartatna nu wantinkiattawai. <sup>4</sup> Niisha aya wíniak enentáimtursarat tusa wakerak, ántar-yusnasha tura nekas Yúsasha shuar tikishmatraraain tusa ti nakitrattawai. Ninki ti nañkaamantu enentáimtumas, Yusa nuke ajas, Uunt Yusa Jeen wayáa pujustatui. “Júiti Yus” shuar turutiarat tusa mash túrittiawai. <sup>5</sup> Yatsurtiram, wi atumjai pujakun nuna ashí ujakmajrume. ¿Nuka kajinmakniurmek? <sup>6</sup> Yámaikikia, ni tsawantri jeatsain, Tuke Tunaarintin wantinkiain tusa surimia nu nékarme. <sup>7</sup> Tunaasha yamaisha awai, tura paantcha. Túrasha tunaan surimia nu juramkitniuk taasai nu tunaaka paant átin. <sup>8</sup> Nuinkia nu Tuke Tunaarintin wantinkiattawai. Tura Úunt Jesus ni wenejai umpuí aun máattawai. Tara ni wincharijjai nuna amuktatui. <sup>9</sup> Nu Tuke Tunaarintin, iwianchi uuntri Satanás akupkam tátatui. Ni kakarmari iniakmastaj tusa, aentsti

túrachminian túrak anaŋkawartatui. <sup>10</sup> Jinium wémin ainia nú shuaran ashí tunáa ana nujai anaŋkawartatui. Nu shuar Yus-Chichaman nekas ana núnaka nakitraru ásar uwemprachmin áiniawai. <sup>11</sup> Iis, nekas ana nuna nakitia ásarmatai, ti anaŋmamawar wait-chichaman umirkarat tusa Yuska tsanŋkatkattawai. <sup>12</sup> Warí, niisha ni tunaarin wararainiak, nekas ana nuna nakitraru ásarmatai, Yuska “jinium wétatrume” tiartatui nuna.

### *Uwempramin ainia nu*

<sup>13</sup> Tura, yatsuru, Uunt Jesus aneamu árumna nu, iisha atumin enentáimtusar ii Yusri yumiŋsaji. Átum nekas ana nuka umikiurme. Tuma asakrumin Yusa Wakaní atumí enentáin péñker awajtamsaitrume. Nu tuma asamtai yámankamtaikniumiä Yuska “átum uwempramniaitrumé” túramprume. <sup>14</sup> Nu túrunat tusa Yus wakerutmarme. Krístujai Uwempratin Chicham ii ujakjinia nujai Yus untsurmakmarme. II Uuntri Jesukristu ti penker pujana nui pachiinkiamniuram tusan ujakmajrume, nú chichaman.

<sup>15</sup> Wátsek, yatsuru, Yusjai katsuärtarum. Yus-Chicham etserkamu antukurmena nu, tura wisha áaran akuptukjarmena nusha kajinmatkiirap. <sup>16</sup> Ii Uuntri Jesukristusha tura ii Apari Yussha ti penker ásar incha anenmatsjik. Tura waitnentrama ásar incha shiir enentáimtikramji. Tura nú naŋkaamas ii tuke péñker pujustinian ikiurtamsaitji. <sup>17</sup> Nu tuma asamtai, péñker chichastarum tusa, tura péñker takastarum tusa Jesukristuka shiir enentáimtikramar ikiakátmarartí.

**3***Papru “áujtursatarum” tímiania nu*

<sup>1</sup> Nuyá, yatsurú, Yusa chichameę shiir pampartí tusarum Yus áujtursatarum. Átum Yus-Chicham wakerukmarmena áintsan̄ ashí nunkanam wakerukartí tusarum Yus seatarum. <sup>2</sup> Tura yajauch shuar, péñker ana nuna ti nakitiainia nu, incha yajauch awajtamsachartí tusarum Yus áujkartustarum. Kame chíkich aents Yúsan umirkacharu ániawai. <sup>3</sup> Túrasha Uunt Jesusak atumin iniaitsuk wáitmaktatrume. Tura atumin ikiakátmartatrume. Tura íwianch anañkramataj takui kíshturmaktatrume. <sup>4</sup> Kame Yus atumin yainmaktatrume, taji. Ii tájinia nu yamái umíarme. Tura tuke umirkattarme. Nusha nekaar shiir enentáimji. <sup>5</sup> Uunt Yus yainmakartí ni aneñkraṭṭairin nekaatniun. Kristu itiurchatan katsuntramia núnisan̄ atumniasha katsuntratniun Yus yainmaktí.

*Takastinianaitji*

<sup>6</sup> Yatsurtiram, antuktarum. Ii Uuntri Jesukrístu chichamejai ju taji: “Nuyá Yus-shuar wi jintinramun nakitiak aya wékana nu ikiukiṭiarum.” <sup>7-8</sup> Ii túrajnia núnisrumek túratin nékarne. Júiti: atumjai pujusmaj nui tuke takakmasmiaji. Atumí yurumkarj iisha akikmakar yurummiaji. Atumjai itiurchat áchatí tusar tsawaishá káshisha tuke takakmasmiaji. <sup>9</sup> Kame iisha, Kristu akatramu asar “yáintkiatarum” tíminiiji; túrasha nu tútsuk, ii túrajnia núnisrumek túratin nekaatarum tusar, iisha tuke tsawant takaamiaji. <sup>10</sup> Warí, atumjai pujumiaj nui “Takastinian nakitiana nuka yurumáshti”

tíchamkaj<sup>i</sup>. <sup>11</sup> Iis, atumiiiniq weeá, nánkamas enentáimiainiak tura nánkamas túruiniak peñké takatsuk pujuiniawai, túramainiaji. <sup>12</sup> Nú shuáran ii Uuntri Jesukrístu chichamejai “Tákamtak shiir takakmasartí” tajai.

<sup>13</sup> Yatsurtiram, yawetsuk shiir túratarum. <sup>14</sup> Ju papinium ii tájinia nuna, shuar umiktinian nakitiakuinkia “umichuiti” tákuram, ni natsarat tusarum ikiuktiarum. <sup>15</sup> Túrasha “Yus-shuara nemasrinti” tiip. Áyatik jintintrata, tura Yúsai enentáimtikrata, ame nekas yatsumea áitkiasmek.

### *Papru aujsua ikuamu*

<sup>16</sup> Uunt Yuska, imiatkitchu enentái susamniaiti. Jú Yus, itiurchatnum pujarmininq atumin tuke imiatkitchu enentáimtikramsarti. Uunt Yuska atumin pujurtamsarti, tajai.

<sup>17</sup> Jui wi Papru juna aajai. Wi papin akupeaj nuii júnisnak winia náarun áaran apujeajai, wíniaiti tusan. <sup>18</sup> Ii Uuntri Jesukrístu atumin ashí yainmakarat tusan wakerajrume. Nu atí.

**Yus Papí: Shuarjai Yus Yamaram Chicham  
Najanamu  
New Testament in Shuar (EC:jiv:Shuar)**

copyright © 2012 Wycliffe Bible Translators, Inc.

Language: Shuar

Translation by: Wycliffe Bible Translators, Inc.

Shuar [jiv], Ecuador

**Copyright Information**

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Shuar

**© 2012, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses,

please contact the respective copyright owners.

2014-04-30

---

PDF generated using Haiola and XeLaTeX on 11 Nov 2022 from source files

dated 29 Jan 2022

fb10d1f0-e2d5-5d8e-8a74-10846708c857